

- भारत री सदरत मांय ब्रिक्स देशां रा ऊर्जा मंत्रियां री मीटिंग गुरुग्राम मांय सरु व्ही-ऊर्जा सुरक्षा, लगातार विकास अर नवाचार रा बारा मांय विचार ।
- मुख्यमंत्री भजन लाल शर्मा लोकतंत्र सेनानियां री हर महीना दी जावण वाळी सम्मान निधि बधा र 25 हजार रूप्या करण रो ऐलाण कीनो ।
- ऊर्जा मंत्री हीरालाल नागर जयपुर रा कुन्दनपुरा मांय देश रा पहला आधुनिक एग्री पीवी प्लांट रो उदघाटन कीनो ।
- प्रदेश मांय आवता चार-पांच दिन तांई चौमासा ऊँ पैली री हलचल चालती रेहवण रो अनुमान ।

000

केंद्रीय ऊर्जा मंत्री मनोहर लाल कह्यो है के ऊर्जा, माली, सामाजिक बरकत अर इंसान रा विकास सारु घणी खास है । वे आज गुरुग्राम मांय ब्रिक्स देशां रा ऊर्जा मंत्रियां री 11वीं मीटिंग मांय बोल रह्या हा । ऊर्जा मंत्री कह्यो के लगातार विकास सारु किफायती, भरोसेमंद अर टिकाऊ ऊर्जा जरूरी है । वे कह्यो के भारत आवता बगत मांय ऊर्जा हलका सारु नवीकरणीय ऊर्जा क्षमता, स्मार्ट मजबूत ढांचा अर भंडारण प्रणाली माथे तेजी ऊँ काम कर रह्यो है । मनोहर लाल कह्यो के देश मांय हाल तांई बिजली रा 6 करोड़ ऊँ बत्ता स्मार्ट मीटर लगा दिया ज्या है । ब्रिक्स देशां रा नुमाइन्दां री आ मीटिंग काल ई व्हेला ।

000

साल 1975 मांय देश मांय लगायी ज्या आपातकाल री वर्षगांठ रे मौके आज लोकतंत्र सेनानियां ने नमन करी ज्यो । ई मौके राजधानी जयपुर मांय ई लोकतंत्र सेनानी सम्मान समारोह राख्यी ज्यो । मुख्यमंत्री भजन लाल शर्मा, उपमुख्यमंत्री प्रेमचन्द बैरवा अर भारतीय जनता पार्टी रा प्रदेश अध्यक्ष मदन राठौड़ ई कार्यक्रम मांय शामिल व्ह्या । ई मौके मुख्यमंत्री लोकतंत्र सेनानियां री मान निधि री रकम बधा र 25 हजार रूप्या महीना करण रो ऐलाण कीनो । वे कह्यो के ई सागे ई लोकतंत्र सेनानियां ने ईलाज सारु ई हर महीना 5 हजार रूप्या दिया जावेला ।

000

लोकसभा अध्यक्ष ओम बिरला आज सवाईमाधोपुर मांय अभियोजन भवन जनता ने सूप्यो । कलेक्ट्रेट परिसर मांय बणायी ज्या ई भवन मांय राजस्थान अभियोजन अधिकारी एसोसिएशन रो शपथ लेवण रो जळसो ई राख्यी ज्यो । ई मौके श्री बिरला अभियोजन प्रकरण प्रबंधन प्रणाली री सरुआत ई कीनी । वे कह्यो के देश मांय दण्ड संहिता ने न्याय संहिता मांय बदलण ऊँ न्याय देवण रो काम तेज अर आसान व्ह्यो है । लोकसभा अध्यक्ष कह्यो के समाज रा गरीब तबका री जनता ने टेम सर न्याय दिरावण माथे अभियोजन रो खास ध्यान है ।

000

वर्धमान महावीर खुला विश्वविद्यालय कोटा राजस्थान पी.टी.ई.टी. परीक्षा रा नतीजा रो ऐलान कर दीनो है । इण ऊँ राज्य रा 900 ऊँ बत्ता बी.एड. कॉलेजां मांय दाखिला दिया जावेला । उपमुख्यमंत्री अर उच्च शिक्षा मंत्री प्रेमचन्द बैरवा जयपुर मांय वी.एम.ओ.यू. रा क्षेत्रीय कार्यालय ऊँ नतीजा जारी कीना । ई मौके वे अव्वल रह्या विद्यार्थियां ने फोन कर र बधाई दीनी । राजस्थान स्टेट ओपन स्कूल ई 10वीं अर 12वीं कक्षा री परीक्षा नतीजा रो ऐलाण कर दीनो है । शिक्षा मंत्री मदन दिलावर जयपुर रा शिक्षा संकुल ऊँ नतीजा जारी कीना । अप्रैल-मई 2026 री परीक्षा मांय करीब 83 लाख विद्यार्थी बैट्या । राजस्थान स्टेट ओपन स्कूल री सचिव डॉ. अरुणा शर्मा बतायो के ओपन स्कूल नियमित स्कूल शिक्षा हासिल नी कर सक्या विद्यार्थियां री पढाई करावण रा मकसद ऊँ काम करे है । वे कह्यो के ओपन

स्कूल छोड़ देवण वाळा बच्चों री तादाद कम करण मांय ई मददगार साबित व्हे रह्या है। वे कह्यो के ऑन डिमाण्ड परीक्षा करावण रा हलका मांय स्टेट ओपन बोर्ड देश मांय अव्वल रह्यो है।

000

शिक्षा मंत्रालय राष्ट्रीय शिक्षक पुरस्कार सारू ऑनलाइन तरीका ऊँ अर्जियां मांगी है। अर्जियां राष्ट्रीय पुरस्कार पोर्टल माथे 10 जुलाई ताई दाखिल करी जा सके है। स्कूल शिक्षा रा हलका मांय बेहतरीन काम, नुवा काम अर समर्पण रो दरसाव करण वाळा अध्यापकां ने हर साल राष्ट्रीय शिक्षक पुरस्कार दे र नवाजा जावे है।

000

राज्यपाल हरिभाऊ बागडे पाली जिला रा सादडी मांय राख्यी ज्या एक धार्मिक कार्यक्रम मांय संतां अर गौरक्षा आन्दोलन रा बारा मांय विचार बताया। ई पाछे श्री बागडे राजसमंद जिला रा कुम्भलगढ किला मांय महाराणा प्रताप रा जन्म री ठौड ई देखी। श्री बागडे अहलकारां ने किला मांय आवण वाळा सैलानियां सारू सुबीता बधावण रा हुकम दीना।

000

जयपुर कने कुन्दनपुरा गांव मांय देश रो पहलो आधुनिक एग्री पीवी प्लांट लगायी ज्यो है। ऊर्जा मंत्री हीरालाल नागर इण रो उद्घाटन कीनो। पीएम कुसुम योजना रा तैत 600 किलो बांट बूता वाळा ई मॉडल ऊँ किसान सूरज री रोशनी ऊँ बिजली बणावण सागे आसानी ऊँ साखां ले सकेला। ई मौके श्री नागर कह्यो के ई नुवी तकनीक मांय सूरज री रोशनी ऊँ बिजली बणावण री मशीनां ऊची लगायी जावे है, जिण ऊँ किसान बिजली पैदा करण ऊँ अतिरिक्त आमदनी सागे साखां ले सकेला।

000

राज्य मांय बीजां ने प्रमाणित करण रो काम और साफगोई सागे अर किसान अनुकूल बणायो जावेला। राजस्थान बीज अर जैविक प्रमाणीकरण संस्था रा संचालन मंडल री आज जयपुर मांय व्ही मीटिंग मांय ओ फैसलो करी ज्यो। कृषि अर उद्यानिकी सचिव मंजू राजपाल री सदरत मांय व्ही मीटिंग मांय बीज प्रयोगशाला जांच अर ग्रो आउट टेस्ट—जीओटी नमूना जांच ने एके सागे चलावण रो फैसलो करी ज्यो। ई सागे ई बीज प्रमाणीकरण सारू लागू कॉप कैलेंडर मांय जरूरी बदलाव रो फैसलो ई करी ज्यो।

000

चौमासा री बिरखा सरू व्हेवण ऊँ पैली राज्य मांय आवता चार—पांच दिन ताई कटे—कटे गरज—चमक सागे जोरदार बायरो बाजण अर बरसात व्हेवण रा आसार है। आवता महीना रा पहला सप्ताह मांय प्रदेश रा केई हलकां मांय बिरखा बधबा रा आसार है। ई बीचे आज दोपहरां पाछे राजधानी जयपुर मांय आंधी सागे करीब पौन घंटा ताई झमाझम मेह बरस्यो, जिण ऊँ केई ठौडां पाणी भर ग्यो। कोटपुतली—बहरोड मांय ई आंधी चालण सागे छांटो—छिड़को व्ह्यो। काल भरतपुर, नागौर, सीकर, चूरू अर श्रीगंगानगर रा कुछ हलका मांय एक—एक ईच अर वां ऊँ बत्ती बिरखा व्ही।

000

निर्जला ग्यारस रे मौके आज आखा राज्य मांय जातरु दान—पुण्य कीना। न्यारी—न्यारी ठौडां सामाजिक संगठनां अर दूजा लोगां री ओर ऊँ छबील लगा र राहगीरां ने ठण्डो पायी ज्यो। निर्जला ग्यारस ने जल सेवा रो खस महत्त्व मान्यो जावे है। दूजी कानी मोहरम काल मनायो जावेला। ओ ये इस्लाम नुवा साल रा 10 वां दिन आशूरा ने मणायो जावे है। कर्बला री जंग मांय हजरत इमाम हुसैन अर वां रा साथियां री शहादत री याद मांय ओ दिन अकीदत सागे गमगीन माहौल मांय मणायो जावे है। ई मौके ताजिया ई निकाल्या जावे है। राजधानी जयपुर मांय मोहरम रे मौके छोटा—मोटा करीब 300 ताजियां रो जुलूस निकाल्यो जावेला। ताजियां मोड़ी रात कर्बला मैदान मांय सुपर्द—ए—खाक कर्या जावेला। राज्यपाल हरिभाऊ बागडे मोहरम शांति सागे मनावण री अरज कीनी है।

000

वेस्ट जोन स्ट्रेन्थ लिफ्टिंग होड़ मांय पाली रा गिरीश रल सोना रो अर राहुल बारेसा कांसा रो तमगो जीत्यो है। आ होड़ छत्तीसगढ़ रा बालोद मांय व्ही ही।

000

देश मांय पोलियो री बीमारी ने जड़ ऊँ खत्म करण रा मकसद ऊँ चलाया जा रह्या राष्ट्रीय पल्स पोलियो अभियान रा तैत 28 जून दीतवार ने पांच साल तांई रा बच्चां ने पोलियो ऊँ बचाव री दवा री खुराक पायी जावेला। स्वास्थ्य अर परिवार कल्याण मंत्रालय रे मुजब राज्य रा सगळा सरकारी स्वास्थ्य केन्द्रां, आंगनबाड़ी केन्द्रां अर खास तौर ऊँ बणायी ज्या पोलियो बूथां माथे आ खुराक पायी जावेला। दीतवार ने दवाई नी पीवण वाळा बच्चां ने 29 अर 30 जून ने स्वास्थ्य कर्मचारी अर आंगनबाड़ी कार्यकर्ता घर-घर जा र आ खुराक पावेला।

000

प्रधानमंत्री नरेन्द्र मोदी आकाशवाणी ऊँ हर महीना प्रसारित कर्या जावण वाळा खास कार्यक्रम "मन की बात" मांय 28 जून ने विचार बतावेला। आ ई कार्यक्रम री 135वीं कड़ी व्हेला। ई सारू आप ई मुफ्त नम्बर 1800-11-7800 माथे 26 जून तांई राय दे सको हो। नरेन्द्र मोदी एप अर माय जीओवी ओपन फोरम रे जरिए ई विचार भेज्या जा सके है।

000